

INUIT ATAQATIGIIT

INATSISARTUNI



UKA 2015/29
24. November 2015
Ane Hansen

**Eqqortuusinnaava pisortat suliffeqarfiutaata Royal Greenland A/S-ip
tunisassiorfinnik nammineq ingerlakkumangisaanik namminersortunut
aallartissartunullu tunisigaangamik unammillinninnissamik pituttuisumik
piumasaqaatitalinnik isumaqatigiissuteqartarnera (konkurrenceklausul)- pillugu,
apeqquteqaat aallaavigalugu Inatsisaartut oqallinnissaannik siunnersuut.**

(Inatsisartunut ilaasortaq Jens Immanuelson, Siumut)

Inatsisartuni ilaasortap Jens Immanuelson, Siumut apeqquteqaat aallaavigalugu oqallisissia takornanngilarput, inatsisartunimi tunitsiviillu akornanni oqallisigineqartuarmat.

Eqqaamaneqassooq 2009-mi Naalakkersuisut nikimmata Royal Greenland A/S pillugu killiffik qanoq ilungersunarluinnartigisimanersooq. Taamani killiffik imaannangilluinnarpoq nalunaarutigineqarmat ullualunnguit qaangiunneranni immikkut aningaasaliisoqanngippat Royal Greenland A/S akiliisinnaajunnaassasoq. Taamanilu immikkut ittumik atukkiillutalu aningaasaliisimangikkaluarutta Royal Greenland A/S akiliisinnaajunnarsimassagaluarpoq.

Siulersuisui pisortaalu taarserneqarput, taamaasiorsimangikkaluaruttalu nunatsinni tunitsiveqarnikkut aalisarnikkullu pissutsit isasoornarsimassagaluarput, soppassuimmi Royal Greenland-ip akuuffigigai, Nunatsinni tunisassiorfiit amerlanerpaat, avataasiorluni aalisartitsiveqatigiit, sinerissap qanittuani aalisariutit ikigisassaangitsut aalisartut peqatigalugit ingerlataralugit minnerunngitsumillu nunatta avataanut tunitsiviit nunatta aningaasarsiorneranut pingaaruteqarnerpaat ingerlataralugu.

Taamani Naalakkersuisut Royal Greenlandip siulersuisortaavinut pisortartaavanullu ersarissumik piumasaqarput, tassa piginneqatigiiffissuup akiitsui nungusarneqassasut, sapinngisamillu nunatta iluani nunatta pissarititaanik imminut pilersorneq nukittorsarneqassasoq. Nunaqarfinni tunitsiviit imminut akilersinnaasunngortinniarneqassasut il.il.

Apeqquteqaat aallaavigalugu oqallisissiamut uunga Naalakkersuisut akissutissaat pissangagisimagaluarpagut, tassuuna paasissagatsigu Naalakkersuisut Royal Greenland A/S-ip siunissaa pillugu qanoq pilersaaruteqarnerisut. Akissummilli takkuttoqanngilaq, tamanna ajuusaarnarpoq. Naalakkersuisummi apeqquteqaat aallaavigalugu oqallisissiaq pingaarutilik isummorsorfiginissaa soqutigisimagunangilaat.

Apeqqut una pillugu Inuit Ataqatigiit ippigisarpaat inuiaqatigiit suliffeqarfiutigisimasaasa namminersortunut tunineqarnerani ukiunik aaliangersimasunik taasilluni unammillinninnissamik piumasaqarneq ippigisarsimavaat, apeqqullu taanna pillugu apuussisarsimavugut. Isumaqarpugullu siunissaq isigalugu pisortat suliffeqarfiutaanik namminersortunut tunisinermi ukiuni aaliangersimasuni unammillinninnissamik piumasaqartarneq qimanneqartariaqartoq.

Maannamulli pisartut tassa illuatungeriit isumaqatigiillutik paaseqatigiillutillu atsiugarisarsimasaat atuutsinneqartariaqarput isumatigiissusiornikkut tamakkua pisimasuummata.

Issatsianguaq avaleraasartorniarnaq pillugu oqallinnerup nalaani piginneqatigiiffiup KNT-p Naalakkersuisunut piumasaraa Royal Greenland-ip ukiuni aaliangersimasuni

unammillinninnissamut piunasaqaatini piissagaa sulissutigeqqullugu. Tamannali aamma Naalakkersuisuniit isummorsorfigineqartillugu tusannngilarput.

Taamaammatt Inuit Ataqatigiit soqutiginnartikkaluarparput Naalakkersuisut apeqqummut uunga tunngatillugu isummorsornerat tusassallugu.

Taamatut oqaaseqarluta oqallinnissamut siunnersuuteqartup oqaaseqaatissatut siunnersuutaa isumaqatigisinnaavarput siunissamut isigisumik aaqqiinissaq siunertarineqarpat.